


J E T Z W I R D P O K E R E T !



Waggse d Baim wie wild im Gaarte,
duesch am beschte nimm lang waarte.
An Gäärtner muesch no lang nit dängge,
die Koschte kaasch der logger schängge.
Frogsch d Queen wie sii daas mache loot,
sy git der denn der aifach Root:
«Laad der Bush zem Bsiechli yy,
mit em Heli kunnt däa denn verbyy,
und schnäller als me denn kaa schwätze,
fliege dyni Baim in Fätze.»
Doo ligt d Froog scho wiider nooch,
pokeret däa äggscht männgisch z hooch?



Vom Nääger syy im aigene Land,
schrybt ai Bartei uff d Wäärbewand.
Der Osama im Schwyzergryz,
soo isch Waalkampf in der Schwyz.
Denn wäggslet no der Bundesroot,
jä wenn denn daas so wyter goot,
machen am Änd die Taalibaan,
mit em Blocher Wäärbig in Afghanistan?
Doo ligt d Froog scho wiider nooch,
wäär pokeret doo am Ändi z hooch?



E Bächli wo am Oobe ruscht,
e Figgli fauchend duure huscht,
e Biiber Stäggli uuse fischt,
der Wind um jeeden Egge zischt.
Daas alles macht de Schwellmer nyt,
doch eppis goot ne dytlig z wyt!
E Läärme wo die ganzi Nacht,
stindlig d Schwellmer hässig macht.
Glaar isch, dass es soo nit goot,
wenn d Kiircheglogge ständig schloot!
Doo ligt d Froog scho wiider nooch,
pokere die nit eppe z hooch?



Jetz hämmer däane noon e Root,
wo in kaim andere Väärsli stoot,
statt em Nääbemaa in d Kaarte z schiile,
geend zämme doch go Roulette Spiile.

Wiirsch phägget vo der Schuggerei,
hesch Angscht de kunnsch so bald nimm frei,
denn dängg der us e gueti Gschicht,
wo d kaasch verzelle voor em Gricht.
Am beschte spiilsch denn d Opferrolle,
dass sy Gnaad lo walte solle,
denn de sygsch doch soo fataal,
gschlaage woorde, ganz brutaal.
D Pherfäggzioon isch jetz nimm schwäär,
wenn Jackson no dy Namme wäär!
Doo ligt d Froog scho wiider nooch,
pokere Staars nit amme z hooch?



Sottsch dringend no Lugaano faare,
und mechtsch derbyy rächt Zyt yyspaare,
so muesch bald via Franggryych goo,
und duur Itaalie der Wääg yyschloo.
Denn dangg ere neie Wysioon,
bisch bi uns scho bald der Gloon.
Statt Autibaan mit hundertzää,
kaasch s Byyljee au grad retour gää!
Doo ligt d Froog scho wiider nooch,
pokeret doo nit epper z hooch?



Isch diir alles ganz egaal,
und Soorge findisch duu banaal?
E Giggli Graas, e Zollistumpe,
bringe dy zem fraidegumpe?
Bass guet uff, s isch bald sowyt,
s kunnt bald dyni groossi Zyt.
De kiffsch und fyylsch dy richtig ryych,
alles isch der schysseglyych.
Daas alles wiird scho glyy legal,
isch daas nit der greescht Skandaal?
Doo ligt d Froog scho wiider nooch,
...isch doch däane schyssegaal!



<http://artleo.free.fr>